

EZEQUIEL

Rawibo joai oinnax, itan rama nato nete jaskara ikí kaai keshati Ezequiel imaa

**Oxaxonmabi namá keska
meranxon Diossen yakati oinna**

1 ¹ Jawen pichika nete itin ja chosko oxe iketianra, ea kimisha chonka baritiaya iká iki, ja yatanxon bokanabo betan, Quebar paro kexa ea iketianra, nai chopeta iki itan namákeska meranxon en Dios oinna iki.

² Ja Babiloniobaon jatoaresxon ja apo Joaquín yatanxon bokana pekáora, moa pichika baritia itan pichika oxe iká iki,

³ Eara sacerdote Ezequiel iki. Nokon papan janera Buzi iki. Jatianra jaskara imanoxon jawen mekenman Ibon ea tii aka iki.

⁴ Jatianra norteokeax, niweaba beaitian enbi oinna iki; ani nai koin meranoaxa, chii kaná keskabo pikota iki, itan jan kateara ikonbires pené iká iki. Ja chii meranoaxa, yami jawéki charáa keská peneta iki,

⁵ Ja napónshamanra joni keska chosko iká iki.

⁶ Ja westíorabora chosko bemananya itan chosko peiabo iká iki;

⁷ Jaton witax pontéshamanbo itan waka baken tae keska mentsisyabora iká iki; akonbireskin bronce charaa keskatira penéta iki.

⁸ Jainoaxibira ja chosko pishpachiori, jaton pei naman, mekenbo iká iki.

⁹ Ja westíorabaon pei rebobora wetsanaki mepiabo iká iki. Ja boira tsoabi wetsaori kayamai, bebonkirires bokana iki.

¹⁰ Ja chosko bemananin jisára neskara iká iki: ja bechiakiri joni bemananya;

mekayao león bemananya; mexkao wakan bemananya; jainoax pekáori aniteté bemananya iká iki.

¹¹ Ja peibora bochikiriti peatabo iká iki. Ja rabé pei bianananax, wetsa rabé pein ja yorabo rakoa iká iki.

¹² Jaticaxbira bebonkirires boi wetsaoribi boyamakana iki. Ja Diossen koshín jain jato boaihorira bokana iki.

¹³ Nato joni keska koshiai jawékibora, tsiste ketea keskábo itan joé chankanakana keskábo iká iki, jabora ja meran ori boax, itan neri beax ikana iki; tirí penébires iketianra, jainoax kanábo pikota iki.

¹⁴ Ja joni keska koshiai jawékibora kaná ikai keskati, ishtonbires ori boax itan neri beax ikana iki.


¹⁵ Ja joni keska koshiai jawékibo oinxon en mai oinnara, ja toró taranmetai westíorabo jato patax iká iki.

¹⁶ Ja chosko toró taranmetaibora jatiobires akin akana keskábo iká iki, topacio makan keskatira peneta iki. Ja toró taranmetai meranra, wetsa toró tarametairibi jaa iki.

¹⁷ Ja chosko katiarira, wetsaori boyamai bebonkiri bokana iki.

¹⁸ En oinnara ja chosko toró taranmetaibo, jan koshia nakatayabobires ikax, itan icha bero keskaraton tenaaton katea iká iki.

¹⁹ Ja joni keska koshiai jawékibo boaitianra, ja toro taranmetaiboribi jato betan kaa iki; jatianra ja joni keska koshiai jawékibo mainmeax wenikannaitian, ja toró taranmetaiboribi wenita iki.



Oxaxomabi namakeska meran joni peiabi beai Ezequielnin oinna.

²⁰ Ja Diossen koshín jato boaiho-rires, ja joni keska koshiai jawékibo boaitianra, ja toró taranmetaibo jato betanbi bokana iki, jaskara ikenra ja joni keska koshiai jawékikibi tekita ikax ja toró taranmetaiboribi jiria iká iki.

²¹ Ja joni keska koshiai jawékibo koshiaitianra, ja toró taranmetaiboribi koshia iki; jawetianki tsasikanai jatianra jaboribi tsasia iki; jawetianki mainmeax keyákanai, jatianra ja toró taranmetaiboribi keyata iki. Ja toró taranmetaibora ja ikanai keskáribia iki, ja joni keska koshiai jawékibokibi tekítabo ikaxa, koshiaiboribi ikana iki.

²² Ja joni keska koshiai jawékibaon mapo manaonra westíora xabá ratéti-bires, chichóbi jishti penébires en oinna iki.

²³ Ja xabá namanra, ja joni keska koshiai jawékibaon peibo pontéshamani peatax bianananabo ikax, ja rabé pein

westíoraxonbo, jaton yora rakoabo iká iki.

²⁴ Jainxonra ja peibo boi titi ikairibi en ninkata iki, westíora paro jenetiax riri ikai keská, jatíbi atipana Ibo yoyo ikai keská, itan sontárobo tsinkitax riri ikai keskára iká iki. Jatian moa tsasi-xonra, jaton peibo namánhakana iki.

²⁵ Ja jaton mapo manaon iká xabá masenenra, riri ika iki, itan tsasiaitii-bira jaton peí namánhakana iki.

²⁶ Ja xabá mananhora, westíora ani yakati zafiro makan akana keská en oinna iki, ja yakátininra westíora joni jisá yakata en oinna iki.

²⁷ Jawen cintura keská ikainoax bochi-kira, yami charáa axon akonbireskin penéakana keská, chiikanbires katea en oinna iki, itan namanra ponté chiikeskares en oinna iki. Penekanbires kateara iká iki,

²⁸ westíora nete, oi beaitian nai koin-hain Diossen koshkí, pikota keskára iká

iki. Jaskáxonra jatíbi jawen kikin pené koshi Ibon ea oinnmaa iki. Ja oinnaxa ea mainbi bekepinon kaman beota iki.

**Diossen Ezequiel jawen
profeta iti kenaa**

2¹Japekáora, ea akí neskatai en ninkata iki: “Ezequiel, mia, joni, ea mibé yoyo inon jikiwe”, ikai.

²Ja ea yoyo akainbira, Diossen Shinan emeran jikixon, ea wenina iki. Jatianra ja yoyo ikai en ninkata iki,

³jainxon ea yoiboresa iki: “Mia, jonira, israelitaboiba en mia raanai, ja jonibora yoitimabo ikax, en yoia akáshamai eki wenikana iki. Jabo itan jaton rekénbora nato nete kamánbi, eki wenitax ramitabo ikanai.

⁴Jainoax jaton bakeboribi, jaton keena keskáres akaibo ikax, kikínbires ninkáismabo iki. Jaboibara en mia raanai, ‘neskáraí Ibo akin’, min jato yoinon ixon.

⁵Jawekeska ixonra mia ninkáxonkanti iki, iamax ayamaribakin, jaskara ikenra yoitimai jaa jonibo iki, ikaxbi westíora profetara jatoiba jake ixonra jabaon onanti iki.

⁶Mia, joni, jatoki rakéyamawe, mia yoikanai joinbi, moxabaon itan jakonma xobibaon katea keskátonin shinan-meetibi, itan ninbo icha napo keskain jaaxbi jatoki rakéyamawe. Jainoax ja mia yoikanai joibo ninkataxbi rakéyamawe, itan ja mia omiskanabi ratéyamawe, kikínbires yoitimabo ikanainbi rakéyamawe.

⁷Kikinbires yoitima ikanainbira, nokon joi min jato ninkámati iki, jawekeska ixonra mia ninkáxonkanti iki iamax ayamaribakanti iki.

⁸Ja en mia yoia keskáakin jakonhakin awé, mia joni, wetsa israelitabo keskati yoitimayamawe. Janxbáwe, ja en mia meniai, min pinón”, akinbo.

⁹Jatianra westíora meken, bichi xei wisháya eki meshkataitian en oinna iki.

¹⁰Westíora mekenmanra, ebebonbi ja bichi xei chopea iki. Okenbekonbi

wisháyara iká iki: jainra onísti, chexakaati itan ramíti onsá yoia iká iki.

3¹Jatianra ea yoia iki: “Mia, jonin, nato bichi xei wishá piwé, japekáora, Israel jonibo yoyo aki mia kati iki”, akin.

²Jatian ea janxbáketianra, bichi xei wisháya ea jan pimaai iki.

³Japekáora ea yoia iki: “Rama nato bichi xei wishá en mia menia xeawe, jatianra mia jan potóti iki”, akin. Ja en piara, kikínbires mishkín keska bata iká iki.

⁴Eara yoia iki: “Ja en mia yoia joibo-ribo kaxon, Israel jonibo yoitanwe.

⁵Ja ninkáyamai join yoyo ikanainkora en mia raanyamai, iamax onantikoma join yoyo ikanainko, jaskáayamakinra Israel joniboiba en mia raanai.

⁶Ja maibotiibi icha joni ikainra en mia raanyamai, onantima itan atikoma join ikanainko. Mia ikonhakanti ikenbira ja joniboiba en mia raanyamai.

⁷Ikaxbi, ja en yoia keskati ikáshamai kopíra, Israel jonibaon mia ninkákan-tima iki. Jatíbi Israel jonibora jaton keena keskáres akaibo iki, itan kikínbires ninkáismabo ikanai.

⁸Jaskara ikenra enbi, mia jato keska-ribo imai, tsonbi yoitinin keenma itan min keena keskáres akai.

⁹Diamante makan keská chorisha en mia imai, makánbi winoa chorish. Kikinbires yoitima jonibo ixon mia omiskanabi, jatoki rakéyamawe, raté-yamaribiwe”, akinbo.

¹⁰Japekáora ea yoia iki: “Jatíbi en mia yoiaibo netékainxon ninkáwe, itan shinanbenoyamawe.

¹¹Ja min kaibobo wetsanko bokanabo yoitanwe, abákanon mia ninkákin itan mia ayamabakanon. ‘Neskáraí Ibo akin atanwe’”, akinbo.

**Jawen tee anon ixon
Diossen Ezequiel katota**

¹²Diossen Shinanman ea weninaitian-ribira, epekaokeax koshi riri ikai niwan keska en ninkata iki, jawen itinkoniata kikin koshi Ibo wenita iki.

¹³Ja joni keska koshiai jawékibaon peibora, bianananbotani boí titi ikai en ninkata iki, jainoaxa ja toró tarametaibo jato betanbi ikax; ja riri ika ani niwannai keská iká iki.

¹⁴Jainoara Diossen Shinanman weninxon ea pikoa, onísbires itan sinata ea kaa iki, jatianribira Ibon jawen mekenman ea akonbireskin yatana iká iki.

¹⁵Jatianra kaax ea Tel Abibhain nokota iki, Quebar paro kexa, ja israelitabo yataanan boxon jamakana iká-tiainko, jawe ati onanaxmabi itan jawe yoiti onanaxmabi, jainra jato betan kanchis nete senen ea baneta iki.

Jato coiranti Ezequiel Diossen imaa

(Ez. 33.1-9)

¹⁶Moa kanchis nete senenketianra, Ibon ea yoia iki:

¹⁷“Miara, Israel jonibo koirannai sontáro en mia imai. En mia yoiabora onankanon ixon, ja joiboribi, min jato yoiti iki.

¹⁸Ea joi benxoakai ixon en yoiti iki, jakonma joni mawáti; en jaskákenbi, ja jakonma joni min esetima iki, min jakonma axé jeneaxa mia jati iki, akinbi min yoiamaara, jawen ocha kopi ja mawáti iki, jaskáketianra jaweati min mawámarin, akin en mia yokáti iki.

¹⁹Ikaxbi ja jakonma joni min jaskáakin eseabi, jawen jakonma jawéki itan jawen jakonma axé jenekashamai, jara, jawen ocha kopibi mawáti iki, ikaxbi miara mawáyamai jaresti iki.

²⁰Jainoax, joni iribati iki, jakon jawékibo akinbi jenexon jakonma akin, jara moa mawáti onsáin en banématai iki; ikaxbi min eseyamaara mawáti iki. Ja jakon jawéki aabeara, en moa ointima iki, jara jawen ocha kopibi mawáti iki, ikaxbi jaweati min mawámarin akin en mia ati iki.

²¹Jatian jaskáakin ocha ayamanon ixon, min eseara ja jonin moa ocha atima iki, jatianra min esé ninkatax

ja joni japariti iki, itan miaribi mawáyamai jati iki”, akinbo.

Ezequiel yoyo iosma baneta

²²Jainxonra Ibon, jawen mekenman tii axon ea yoia iki: “Wenítaanan mai teshanpain katanwe, jainxonra en mia yoyo aki kaai”, akin.

²³Jatianra ea wenitax mai teshanpain kaa iki, jainxonra Quebar paro kexaxon oinhantana keskáribiakin, en Ibon koshi oinna iki. Jatianra mainbi bekepinon kaman ea beota iki,

²⁴ikaxbi Diossen Shinan, emeran jikixon ea wenina iki. Jainxonra ea Ibon yoia iki: “Min xobonko kaax xepótanwe.

²⁵Oinwe, miara risbikan nexai bokanai, jaskákanara min jonibo betan ikasibi mia pikótima iki.

²⁶Jainxonra mia yoyo itima akin, min jana en jantaxnamematai iki. Ikonbires yoitimabo ikanainbira, min jato notsin-tima iki.

²⁷Ikaxbi jawe yoikaskinra, en mia jakiribi yoyo imati iki, jatianra min jato yoiti iki: ‘Neskárai Ibo akin’. Jaweratobaonki ninkákasai, jabaonra ninkáti iki, ikaxbi jaweratobaonki ninkákashamai, jabaonra ninkátima iki. Yoitima jonibo ixon”, akin.

Nonbix koiranmeeti

18¹Ibonra ea yoia iki: ²“¿Jawekopíki: ‘Papabaon uva pae kokoketianra, bakebaon xeta beyatai iki iká joi israelitabaon yoikin jene-yamai’?”

³Ea, jiria Ibo jaxonra, en mia akonkin senenhatai ixon yoiai, matonra nato jakonmakanaibo ja meranxon jato ninkámatai joi, Israelhainxon moa yoikin bane wetsatima iki.

⁴Ninkakanwe, jatíbi jonibora nokona iki, papa itan bake. Jaweratoki ochai, jara mawáti iki.

⁵Ja ponté joninra, atikeskabiakin jakon akai itan ponté akai iki:

⁶jara jatonbi ja rabiti akábo rabikin mai keyá ikainxon icha jawékiati axon

fiesta akanainko jato betan iamai, Israelnin ikonma diosbokira koshiamai; jawen rarebaon awinra bichinyamai, jawen awin jimiketian yoranyamai;

⁷tsoabira ramiayamai, jaskáyama-kinra ja ribínxon menikana jawéki jato banexonai; tsoabira jato yometsoayamai; pikasaibora jato pimai itan chopaomabora jato meniai;

⁸jaribi banenoxon koríki bichina kopíra jato bebon bichinyamai, tsoabira jato bebon kopíamaskin teayamai; tsoabira ramiayamai; joni rabé join ikaitianra atikeskabiakin jato benxoaxonai;

⁹nokon esébaon yoia keská akinra, ja en ati yoia nokon koshi esébo akonkin senenhai. Ja jonira ikonshaman ponté ikax, jarésti iki. Ea, Ibonra, ponté yoiai.

¹⁰Ikaxbi iti iki, ja ponté jonin benbo bake, ishtonbires sinátaanan jato jakonmai itan retemis, jainoax wetsa jawékibires akí,

¹¹jawen papan ayosma, wetsa jawéki-bires akai, yoiti atipanke, mai keyainxon jatonbi ja rabiti aká, rabikin icha jawékiakin fiesta akanainko kaai, jawen kaibaon awin bichinai,

¹²jawebiomabo betan jawékinin maxkatabo jato masá tenemai, wetsabo jato yometsoai, ja ribínxon menikanabo jato banexonyamai, ikonma diosboki koshiai, itan en omisai jawékibo akai,

¹³ja koríki menixon jato bebon bichinai; jainxon jato bebon kopíakanon ixon teai, jaskara jonira jatima iki. Ja en omisai jatíbi jawékibo aká pekáora, ja joni mawáti iki.

¹⁴Ikenbi ja joni iti iki westíora benbo bakeya, jatíbi jawen papan akai ochabo jan oinbea, ikaxbi jawen papan jakonma axébo chibanyamai;

¹⁵ja yoiti atipanke, mai keyainxon jatonbi ja rabiti jawéki axon, rabikin icha jawékiakin fiesta akanainko kayamai, jainoax Israelbaon ikonma diosboki koshiamai; itan jawen kaibaon awin bichinyamai,

¹⁶tsoabi ramiayamai; ja koríki menixon jato teaxon jawéki bichinyamai; tsoabi yometsoaisma, ja pikasaibo pimai, itan chopaomabo jato meniai;

¹⁷tsoabi jakonma imayamai, koríki menixon jato bebon bichinyamai, nokon esébo senenhai, itan ja senenhati join yoia keská akai: ja jonira jawen papan ocha kopi mawáyamai, ikontinixbi jati iki.

¹⁸Jatian jawen papara, ramiamis ikaati, jato yometsoai, jawen kaibaon jishnonbi jakonmabo akai, jara jawen ocha kopibi masá tenei mawáti iki.

¹⁹Matonra rama yokatai: ‘Jawekopíki jawen papan ocha kopi, baken masá tenetima iki?’ akin. Ja bakenra ponté itan atikeskabiakin jakon aká iki, itan jatíbi ja nokon esekan yoiai keskaa: jaskara kopíra ikontinixbi jati iki.

²⁰Ja ochaiboresa mawáti iki. Bakenbira jawen papan ocha kopíatima iki, papanbira jawen baken ocha kopíatima iki. Atikeskabiakin jakon akai joninra ja atikeskabiakin jakon aká ixon, jawen kopí biti iki; itan jakonma joninra jawen jakonma aká kopí, masá teneti iki.

Ja ati keskábiakin Ibon akai

(Ez. 33.10-20)

²¹Jatian jakonma jonin jatíbi ocha akábo jawetianbi awetsayamanoxon jenexonra, jatíbi nokon esébo senenhati iki, pontéshamanres ati iki, itan atikeskabiakin jakon akai, ikontinixbira já mawáyamai jati iki.

²²Enra jakiribi min jatíbi jakonma aká ochabo shinan wetsatima iki, ja jonira ponté akai ikax jati iki.

²³Eara jakonma jawéki akai joni mawátinin keenyamai, jawen jakonma akaibo jenetaanan jatikayara, jakon iti iki. Ea, Ibonra, ponté yoiai.

²⁴Ikaxbi ja atikeskabiakin jakon akai jonin ponté jakon akinbi jenexon, jatíbi jakonma ati iki, ja jakonma jonin akaira en omisai, ¿Maton shinannaki jaskarabo jaapariti iki? Jatíbi jakon jawéki moa

akáborá en shinanxontima iki: janbí senenhayama kopí itan jawen ocha kopíra mawáti iki.

²⁵Atikeskabiakinra en ayamai ixonra maton yoiti iki; ikaxbí ninkakanwe Israel jonibó, ¿Matonki shinanai en jakonhakin ayamai ixon? ¿Jawekeska ikaxki matobikayama iti iki, ja jakonma akaibo?

²⁶Atiki ja atikeskabiakin jakon akai jonin jakon akin jenetaanan, jakonma akin, jara jawen jakonma aká kopíbi mawáti iki.

²⁷Jaskáyamakin atiki ja jakonma jonin, jawen jakonma jenexon, ponté itan atikeskabiakin akin, jatianra jawe jati kishpinmati iki.

²⁸Ea ninkatax itan, ja akai jawékibo jatíbi jakonma íketian, awetsayamanoxon jakonma jeneaxa, íkontinixbí já mawáyamai jati iki.

²⁹Ikaxbí mato Israel jonibaonra en atikeskabiakin jakon ayamai yoiái. ¿Enki ja atikeskabiakin ayamai? ¿Ja atikeskabiakin jakonhakin ayamaiki Israel jonibokayama iki?

³⁰Ja mato israelitabaon westíora-xonbo akai keskáribiakinra, en mato yoipaketi iki. Ea Ibonra ponté yoiái. Maton jakonma ocha kopí, mato keyotamatianbí, jatíbi maton akai jakonma jawékibo moa jenekanwe.

³¹Ja eki ramíkin, jawetianbí awetsayamanoxon jatíbi maton jakonma aká jawékibo moa jenekanwe, westíora jointiabicho, itan bená shinanyares íkanwe. ¿Jawekopíki mato mawáti iki Israel jonibó,

³²tsoabi mawátinin ea kenyamainbí? Jawetianbí awetsayamanoxon, jakonma jawéki akin moa jenetaanan jakanwe. Ea, Ibonra, ponté yoiái”, akinra aká iki.

Jato koirankin sontaronin senenhati

(Ez. 33.16-21)

33 ¹Ibonra ea yoia iki:
²“Joní, min kaibobo yoiwe: ‘En imaara wetsa mainmea jonibo betan reteanankanti iki, jatianra jainoa joni

koshibaon westíora joni katóxon, jato koirannai sontáro imati iki.

³Jatian jaton rawí sontárobo ja mai nokoi bei, ochómaitian oinxonra, jonibo benxokaanon ixon, jato koiranti imakana sontáronin jawen trompeta xoon ati iki.

⁴Jaweratonki ja trompeta xoon ikai ninkáxonbí ikonhayamai, jatianra jaton rawibaon nokóxon reteti iki, ja mawata-tara janbíx iká iti iki,

⁵ja trompeta xoon ikai ninkáxonbí ikonhayamaa kopíra; janbíx mawata iti iki, ja ninkáxon ikonhaxa mawáya-makeana iki.

⁶Ikaxbí jato koirannai sontáronin, jaton rawí sontárobo nokoti beai oinxonbí, jonibo benxokaanon ixon trompeta xoon ayamaketianra, jaton rawibaon nokoxon jaweti joni reteti iki, jabora jaton ocha kopíbi mawáti iki, ikaxbí minra jato mawámake ixonra, jan jato koirankin oinnai en yokáti iki’.

⁷Mia jonira, Israel jonibo jato koirannai iti en imaa iki. Minra nokon joi ninkaxon, en jaskátima yoia joiboribi min jato keshanti iki.

⁸Jatian ja jakonma joni mawáti en yoiara iti iki; ikaxbí jawen iká jakon inon ixon min keshanabi iamaaxa, jawen ocha kopíbi mawáti iki, ikaxbíra jaweati min mawámarin ixon en mia yokáti iki.

⁹Ikaxbí min, jaskáyamakin ja jakonma joni jawen iká jakon inon ixon, min keshanabi jeneyamaaxa, jawen ocha kopíbi já mawáti iki, ikaxbíra mia mawáyamai jati iki”, akinra aká iki.

Ocha aká jatonbí iboati

(Ez. 18.21-32)

¹⁰Ibonra yoiribia iki: “Mia joninra, Israel jonibo yoiti iki: ‘Matora ikai neskati: Nonra ichabires jakonma itan ichabires ocha aká iki. Jakopira moa jakon jati non manayamai. ¿Jawekeskaxonki jaskara jati non chibanti iki?

¹¹ Ikaxbi ea jiria Ibo jaxonra akonkin senenhati ixon yoiai, eara keenyamai jakonma jawéki aati joni mawátinin, ikaxbi jawen jakonma iká jenetaananra, jati iki. Israel, ja mia jakonmai jaa jenéwe. ¿Jawekopíki mato mawáti iki?

¹² Mia, jonin, min kaibobo yoiwe: 'Iti iki westíora jakon joni ochai, ja moa abea jakon jawékininra mawáyananon ixon jamatima iki, itan jakonma jonin ati iki, jakonma akin jenekin, já mawataara moa abea ocha kopi ikama iti iki. Iti iki jakon joni ochai, ja moa abea jakon aká kopi jayamaira mawáti iki.

¹³ Ja jakon joni janon ixon en yoiabi, jan jakon jawéki akaiki koshixon jakonma ati iki, jatianra ja moa jakon jawéki abeabo en oinna moa jakonma iti iki, janbi jakonma aká kopira mawáti iki.

¹⁴ Jakonma joni mawáti en yoia ikenbira, ocha jeneax jakoni, itan atikeskabiakin jakon ati iki,

¹⁵ Itan ja ribínxon menikanabo jainxon jato yometsoabo banexonax, itan en menia esébo yoiti ixon senenhai, jainxon moa jakonma jawéki akin jeneaxa, ikontinixbi mawáyamai jati iki.

¹⁶ Jaskáakin rama, jakon akí itan atikeskabiakin jakon akíra jati iki, jatianra ja ocha akatiaibo westíorabi en moa shinantima iki'.

¹⁷ Min kaibobaonra atikeskabiakin en ayamai ea yoiai; ikaxbi jabaon atikeskabiakin ayamaikayara ikon iki.

¹⁸ Jaskara iken jakon jonin ati iki, jakon jawéki akin jenexon, jakonma akín, jakopira mawáti iki.

¹⁹ Itan ati iki, jakonma joninbiribi jakonma jenexon, jakon akin itan atikeskabiakin jakon akín, jaskara aká kopira jati iki.

²⁰ Matonra yoiribiai: 'Ibonra ja atikeskabiakin ayamake ixon'. Ikaxbi enra, mato israelitabo, westíoraxonbo maton aká keskáribiakin, en mato yoipaketi iki", akinbo.

Babiloniobaon Jerusalénhasesa

²¹ Ja noa yatanxon bokana chonka rabé baritia iketian, jawen chonka oxé itin itan pichika neteya iketian yaméra, westíora joni Jerusalénhainoax jabatax joxon ea yoia iki, ja jaton rawibaon moa jema bichinna.

²² Ja jabata joni eiba joamapari inontian yaméra, jaskara amanoxon Ibon jawen makenman ea tii aka iki, jatian yamékiri joni joketianra Ibon jakiribi yoyo ikai ea imaa iki, jatianra moa yoyo iosma ikí en jeneta iki.

²³ Ibonra ea yoia iki:

²⁴ "Nato Israel main iká jemabo ras akanainko jaa jonibora yoyo ikanai: 'Abrahamra jabicho ikaxbi mai ibo baneta iki; jaskara ikenra noakaya icha ikax ibiresti iki'. Ikira ikana iki.

²⁵ Jaskara iketian jato yoiwe: 'Neskárai Ibo akin: Matonra nami jimiabi piái, matonra ja rabiti jawékibo axon rabiai, itan mato retemisbo iki, ¿Jatianki maton ikonhai, noara mai ibo iti iki ixon?

²⁶ Matora jan amistiki chipóxon jato ishtonbires ramiaibo iki, en omisai jawékibora maton akai, itan awinyaribi ikaxbira, jatikaxbi mato teananaibo iki, ¿Jatianki maton ikonhai, noara mai ibo iti iki ixon?

²⁷ Jainxon jato yoiribiwe: 'Neskárai non Ibo akin: Ea, jiria Ibo ixonra akonkin senenhati ixon en yoiai, ja jemabo ras akanainko jaaboribira rete-kanti iki, itan xabain jaabora pimis yoinabaon piti iki, jainxon ja shanka xobo meran jaabo itan kini meran jaabobora, isinbaon mawákanti iki.

²⁸ Ja tsoa jonibi jain jaama maira ras ikares banéti iki, jainoax jaki koshiax kikinini rabíkanai jawékibora moa jainres keyóti iki. Israelhainoa mananbora tsoa jonibi jain jaama banéti iki; tsoabira jao winótima iki.

²⁹ Jatian jabaon, ja en omisai ochabo aká kopíra, ja mai tsoa jonibi jain jaama

itan janbisresa en jeneti iki, jatianra ea Ibo onankanti iki’.

³⁰Min kaibobora makan chiké patax-keax itan xobo xepotaiinoaxbo, mia yoií yoyo iki yoiánankanti iki: ‘Neri bekanwe, Ibon noki joi raana non ninkánon iki’, ikanti iki.

³¹Jaskati beaxa nokon jonibo, jaton axé keskati, mia yoyo ikaitian ninkati, mii bebon yakákanti iki. Ikaxbira, ja yoia keskati ikantima iki. Jakiribi en yoiara ainboki itinres bewakanti iki, ikaxbi ja akonkin shinan meran noikana koriki iki.

³²Jabaonra mia oinnai westfóra joni ainboki bewati onan keskáakinres, metsá jeeya itan arpa jakonhakin teenhati onan. Min joira ninkákanai, ikaxbira min yoia keská jayamakanai.

³³Jaskara ikenra, jatíbi jábo seneni kaai, itan jaskati senenketianra, jabaon nobetanra westfóra profeta iká iki ixon, shinankanti iki”, ikira iká iki.

Israel pastorbo ramíti yoia

34 ¹Ibonra ea yoia iki:
²“Mia jonin, nokon janenko ja Israel pastorboki ea ramitai yoiwe: Neskárai Ibo akin: ¡Jawe ireskiaí, ja jatonbinix koiranmeetai Israel pastorbo! Ja pastorbaonkayara carnerobo koiranti iki.

³Matonra leche xeai, chopa akinbora maton lanaya akai, jainxonra carnero awin xoashamanbo maton reteai, ikaxbira ja carnerobo maton koiranyamai.

⁴Ja carnero yosmashokobora maton akinyamai, isinaibora maton raonyamai, jaton tae xatéra maton neaxon-yamai, wetsaori kainbira maton biamai, manókenbira maton benayamai, jaskáatitanbira maton akonbireskin rishkikin itan ramiaresai.

⁵Jaskati pastorhoma ikaxa, nokon carnerobo, jatíbiain janbisai, jaskáketianra siná yoinabaon pai.

⁶Jatíbi mananbotiibi itan mai keyábaonra janbisa iki, jatíbi maibo ikainra

wetsaori bokanai, itan tsonbira jatoakin shinanyamaa iki, jainxon benayamaa iki.

⁷Jaskara iken pastorbo, jakonhakin nokon joi ninkakanwe.

⁸Ea, jiria Ibonra akonkin senenhati ixon en yoiái: Nokon carnerobora pastorhoma iketian meskó siná yoinabaon yatanxon ea pikin keyonankanai. Ja nokon pastorbora, carnerobo benaibi boyamakanai. Ja pastorbora carnerobo koiranyamai jatonbinix koiranmeetaboreshiki.

⁹Jaskara ixon pastorbo, nokon joi ninkakanwe,

¹⁰ea Ibo ixonra mato yoiái: Eara maton rawí iki ixonra, en mato onanmai, nokon carnerobo kopí matoki ramíkinra en mato akai; enra nokon carnerobo moa mato koiranmayamai, moa maton koiranwetsayamanon ixonra, nokon carnerobo kopi kopíaxon en moa jakiribi biti iki, moa maton piboresyamanon ixon’.

Ibo, jakon pastor

¹¹Ea, Ibonra yoia iki: Ramara enbix, ea nokon carnerobo koirannai ikai.

¹²Pastornin jawen carnerobo janbisketian, akonbireskin shinanai keskáribiakinra, enribi nokon carnerobo akonbireskin shinanti iki; ja wetsa nete niweaba bei yaméketian, janbisax beyamai jainbi banetabora jato kopi kopíaxon en jakiribi biti iki.

¹³Wetsa mainmeabo pikoxon tsinixonra, en jaton mainbiribi boti iki. Israel mananmamea pastobo pimaxonxon, jainxon wean ikainboribi, itan jatíbiain ja joni jaainkobo.

¹⁴Ja Israelhain manan keyábo ikainko, jakon pastoshamanbo pimaxonxonra, en jato boti iki. Jainra jakon pastoshamanbo piach, tantikanti iki.

¹⁵Eabi, nokon carnerobaon pastor ixonra, jato tantimanoxon en boti iki. Ea, Ibonra ponté yoiái.

¹⁶Ja manota carnerobora en benati iki, ja wetsaori boabora en jato beti iki,

ja tae xatáyabora en jato neaxonti iki, ja yosmabora en jato akinti iki, jainxon awin xoashamanbo betan koshibora en jato koiranti iki. Ja atikeskabiakinra en jato koiranti iki.

¹⁷Ea, Ibonra yoiyai: Ninkakanwe, nokon carnerobó: Juezsen ati keskaakinra, en mato akai ja carnero beneshokobo wetsaori axon itan cabra beneshokobo wetsaori axon akin.

¹⁸¿Jakon pasto piابخiki mato tantiamai, jaskákinki ja texeabo maton jamatai? Itan matonra onpax bexnanshaman xeai, jaskáribaxonbira maton taen potaai.

¹⁹Ja maton jamáyona pastora, nokon carnerobaon piti iki itan ja maton potáyona onpaxa xeakanti iki.

²⁰Jaskara kopíra ea jatíbi atipana Ibon, mato yoiyai: Enbira mato yoipakeai atikeskabiakin, carnero awin xoábo wetsaori axon itan oshibo axon akai keskaakin.

²¹Ja yosmashoko carnerobora maton weranmanbires ochóa iki, itan machamanbires jakonmakin werankinra, maton jabámaa iki.

²²Ikaxbi enra nokon carnerobo jakiribi biai. En amayamaara moa maton yatanborestima iki. Atikeskaakinra, ja carnerobo en akai.

²³Nokon yonoti David-ra, en jakiribi banémai, janra westíora pastorbicho keská ixon, nokon carnerobo koiranti iki. Itan jara jaton pastor iti iki.

²⁴Ea, Ibonra, jaton Dios iti iki, itan nokon yonoti David-ra jaton koshi iti iki. Ea, Ibonra, jaskati yoyo ike.

²⁵Jabo betanra jaskara senenhabekonti joi en akai, jawe iamai ikoni jakon mato inon ixon. Siná yoinabo ja mainmea potaxonra, nokon carnerobo xabábires ikain jakonshaman ikanon ixon en ati iki itan manish meran oxakanon ixon.

²⁶Ja nokon manan katemakinra, en jato jamati iki, jainxonra en jato jakonhakin shinanti iki; ja ititianbora en jatoki jakon oi bemati iki.

²⁷Ja xabáinoa yobinbora bimiti iki, jatian ja mainmea tsekakanti iki,

jaskataxa jaton mainbiribi jaabo jakonbires jakanti iki. Jawetianki nokon jonibo, ja yanka yonokin bokanainoa en jato pikoai, jatianra ea Ibo onankanti iki.

²⁸Wetsa mainmea jonibaonra, jabo moa jakiribi iboakantima iki, siná yoinabaonra moa jakiribi jato pitima iki. Jatianra moa tsonbi rateyamaa jakonbires jakanti iki.

²⁹Ja banábora ikonbiresi xoxoti iki, jatianra jabaon moa jakiribi jawékiatinin ikin, masá tenetima iki, wetsa mainmea jonibora moa jakiribi jatoki shirotima iki.

³⁰Jatianra ea jaton Ibo Dios, jato betan iketian ea onankanti iki, jainxonra Israelbo nokon joniboribi onankanti iki. Ea, Ibonra, ponté yoiyai.

³¹Mato nokon carnero tsamabora xabaa ikáinoa iki. Eara maton Dios iki. Ea, Ibonra, ponté yoiyai”, akinra ea aká iki.

Jara kikinbires jakon iki ixon Ibon oinmati

36 ²²Ibonra ea yoiyai: “Israel jonibo yoiwe: ‘Ibonra neskara yoiyai: Ja en ati jawékira, mato israelitabo kopíma iki, ja wetsa mainmea jonibo xarán mato janontian, nokon jakon jane maton ramia kopí riki.

²³Wetsa maibo ikainoa jonibo bebonra, ea iki kikin itan jakonshaman ixon en jato oinmati iki, jabo xaraxon maton ea ramia iketian; en jaskáara jabaon, eara Ibo iki ixon onankanti iki. Ea, Ibonra, ponté yoiyai.

²⁴Enra, mato jatíbi ja wetsa jonibaon mainmeabo pikoti iki; itan jaskáxon tsinkixonra, en jakiribi maton mainko beti iki.

²⁵Kerás neoma onpaxen akai keskaakinra en mato chokati iki, itan jatíbi maton kerásainoara en mato xabaati iki, ja rabiti matonbi aká jawékibo axon rabiainoara en mato jawe kerás neomabi imati iki;

²⁶enra mato meran bená jointi itan bená shinan imati iki. Ja mato meran iká

makan keska chorish shinan bichinxonra, taamabires shinan en mato meran ati iki.

²⁷Ja nokon shinanra en mato meran imati iki, nokon eséboyabi nokon koshi joibo maton senenhanon ixon;

²⁸jatianra en maton anibo menini mainko mato jamati iki, jatian nokon jonibo mato iti iki, itan ea maton Dios iti iki.

²⁹Ja maton jatíbi jakonmainoara, en mato xabáati iki. Trigora en kaimati iki, jatianra en mato jawékiatinin imatima iki.

³⁰Jainxonribira, yobín jiwibo betan wainkonía banábo en ichabires bimimati iki, jatianra wetsa mainmea jonibo bebon, ja pitin ikai kopí, mato rabin-tima iki.

³¹Jawetianki, maton jakonma ikábo itan maton jakonma akábo shinanai, jatianra matonbinix mato rabínti iki, itan maton icha ochabo aká kopí.

³²Ea, Ibonra, ponté yoiai: Onankanwe israelitabó, natora maton jakon aká kopí en akaima iki; natora maton ikainkobo jakonma aká ikax mato rabínkanon ixon en akai iki.

³³Ea, Ibonra yoiai: Jawetianki jatíbi ochankonia en mato jakon imai, ja ras ionna jemabora maton benáaribati iki, jaskáxonra en mato jain jamati iki.

³⁴Ja mai jain jawebi xoxoyamai baneta ikenbira, jaskara jawebioma iititiani; jatíbi jain winotaibaon oinna moa orokana iti iki.

³⁵Jainxonra yoikanti iki: nato mai jain jawebi xoxoyamai baneta iitibira, rama jain jakon jati Edénhain keská iki; ja jemabo keyokin, ishtonbires jakonmakin ras ayonxon jenekanibora, rama koshiakin jakonhayonaxbo jain jakana iki.

³⁶Ja patax iká wetsa main jabaonra, ja ras akana jemabo en benáaitian, itan jamákin baná keyokanabo en banari-biaitian oinxon, ea Ibo onankanti iki. Ibo ixonra en yoiai, enra akí kaai ixon.

³⁷Ibo ixonra en yoiai: Wetsa jawé-kiboribira en akí kaai ixon. Ja Israel

jonibaon yokata keskákinra; carne-robo kaitai keskáakin, en jawen jonibo kaimaxonti iki.

³⁸Ja jemabo ras ayonkana jawebioma ikátiibira, ikonbiresi jonibo kaiti iki, jaskatira ja fiestatian Jerusalénhainxon, menonoxon carnerobo bokanai keská ikanti iki. Jatianra nokon jonibaon, ea Ibo onankanti iki' ", akinra ea aká iki.

Xao tanobo

37¹Ibonra jawen mekenman ea tii axon, jawen koshi shinan ea menia iki, jaskáxonra westíora mai teshanpain, kikinbires xao ichanko ea boá iki.

²Jatianra Ibon jatíbiain en nimaa iki; ja mai teshanpara xon bochoa, kikinbires icha itan moa ikonbiresi tanoabo iká iki.

³Jatianra ea yoia iki: "¿Minki ikonhai nato xaobo, jakiribi jiríax joniti?" akin. Enra yoia iki: "Ibó, minresa onanke akin".

⁴Jatianra ea Ibon yoia iki: "Nokon janenko nato xaobo yoyo awe, jainxon yoiwe: 'Xao tanobó, Ibon joibo ninkanwe akin.

⁵Ibonra mato yoiai: Mato jakiribi janon ixonra, jiwéti join enbi mato meran jikimai akin.

⁶Ja xao rexkebo tekímaxonra, namimaxon en bichín rakoai, jainxonra ja jiwéti join en meniai jakiribi jatiakin. Jatianra maton ea Ibo onanti iki ixon yoiwe' ", akinra ea aká iki.

⁷Ea, jan jaskati yoia keskákinra, en jato yoyo aka iki. Jato yoyo akinbira, kerox ikaibo en ninkata iki: jatianra niwanna iki, jaskatainra xaobo jainbicho biananani peokoota iki.

⁸Jatianra, ja xao rexkebo moa namiketian bichín rapoai en oinna iki. Ikaxbira, jan jiwémati joínhomabo iká iki.

⁹Jatianra ea Ibon yoia iki: "Nokon janenko, jiwémamis join yoyo awe, itan yoiwe neskáakin: 'Neskárai Ibo: Jiwémamis join, jowé, jawen chosko

pasenenaorikeax, nato mawá yorabo janon ixon jiwémai', akin yoiwe", akin.

¹⁰Enra, Ibon janenko jato yoyo aka iki, jan ati yoia keská akin, jiwémamis join joáxa, jabo meran jikia iki, jatianra jakiribi jiriáx moa weníkana iki. Jabora ikonbires icha, westíora tsamá sontá-robo iká iki.

¹¹Jatianra ea Ibon yoia iki: "Israel jonibora nato xao keskábo iki. Jabaonra yoiboresai: 'Non xaoa tanobo iki, noara jawen manátimabi ikax; manotabo iki', akin.

¹²Jaskara iken, nokon janenko jato yoiwe: 'Neskárai Ibo akin: Nokon jonibo, enbira mato nokon jonibaon kinibo kepenai; jainoara en mato pikoai, jaskáxonra jakiribi en mato Israelhain jomai.

¹³Nokon jonibó, jawetianki maton kinibo kepenxon, en jainoa mato pikoai, jatianra ea maton Ibo maton onanti iki.

¹⁴Enra, mato meran nokon jiwémamis join imati iki, jatianra mato jakiribi jiriti iki; jaskáaxonra en maton main imati iki. Jatianra, ea Ibo ixon yoiabo itan en akábo maton onanti iki. Ea, Ibonra ponté yoiái, akin jato yoiwe' ", akinra aká iki.

Judá jonibo itan Israel jonibo tsinkita

¹⁵Ibonra ea yoia iki:

¹⁶"Ezequiel, westíora jiwi pakex bixon jain wishawe: 'Judá betan Israel rabeta', Japekáo wetša jiwi pakex bixon wishawe, Efraínra Josekan toan iká iki, itan jatíbi Israel texeabo betan rabeta iki.

¹⁷Jatianbi, rabé jiwi pakex bixon kataxkin yatanwe, westíorabicho itiakin.

¹⁸Jawetianki min kaibaon noa yoiwe akin mia akai: 'Noa yoiwe, jawe yoií ikarin, nato akin',

¹⁹jatian jato yoiwe: 'Neskárai, Ibo akin: Enra, Josekan jiwi biaí, ja Efraínman mekenman iká, jainoax jabé rabeta ja Israel joniboribi, jaskáxonra westíora jiwibicho itiakin enbi Judakan

jiwi betan kataxai, westíorabicho nokon mekenman itiakin', akin jato yoiwe,

²⁰Jaton jishnonbira ja min jain wishaa jiwi rabé, min mekenman iti iki.

²¹Japekáo jato yoiwe: 'neskárai, Ibo akin: Ja israelitabo wetša maibaon bokanabora, enbi jato biaí; jatíbiainoara en jato tsinkiai, jaskáxonra jaton mainbiribi en jato imaribiai.

²²Nato Israelbaon mainra ja manánbo ikain, en westíora joni tsamáres imati iki, westíora apoyares. Moara rabé tsamá jonibo itima iki, itan rabé koshia-riwi iwetsatima iki.

²³Matonra jakonmabo jakiribi atimariwi iki, ja en omisai jatonbi ja rabiti aká jawékibo moa rabikantima iki, meskó ochaboribi moa akantima iki. Jatíbi ja senenhayamai ochakanabora en jato xabáati iki, itan jaton ochabo kopí en jato jaweatima iki, jabora nokon joni iti iki, itan eara jaton Dios iti iki.

²⁴Nokon yonoti Davidkan chiní bakera apo iti iki, itan jatíbi jabaon westíora pastor jabicho iti iki, jatianra jabaon nokon esébo betan nokon koshi joibo ninkáxon ea senenhaxonkanti iki.

²⁵Ja nokon yonoti Jacob en mai meni-niainra jakanti iki, jaton yosibo jakátikanainkoribi. Jabora jatíbitian jain janoxiki, jainoax jaton bakebo, itan jatíbi jaton chiní bakebo; jatian nokon yonoti Davidkan westíora chiní bakera jatíbitian jaton koshi iti iki.

²⁶Jainoax jabo betanra, jaskara senenhabekonti joi en ati iki, jawe iamai ikoni jakonshaman jakanon ixon. Ja senenhabekonti joira jatíbitianbires iti iki. Enra jato kaimati iki, itan nokon jakon xobora jatíbitian jato betan en imati iki.

²⁷Eara, jato betan jati iki, jatianra ea jaton Dios iti iki, itan jabora nokon jonibo iti iki.

²⁸Ja nokon jakon xobo jatíbitian jato betan iketianra, wetša mainmea joni-baon, ja Israel jonibo nokona itiakin, en jato katota onankanti iki' ", akinra ea aká iki.